

遼

史

拾

遺

補

遼史文筆簡嚴而事多疏略錢塘厲徵君鶚特爲拾遺  
二十四卷博采旁搜粲然大備矣第當是時舊五代史  
尚沈晦於永樂大典中未經寓目而契丹國志宋元通  
鑑所載弃置孔多不免語焉弗詳之憾余因更爲之補  
以三書爲綱而以散見他書者附益之得四百餘條分  
爲五卷非敢云苴歐揭之罅漏亦聊步樊榭之後塵云  
爾乾隆五十九年秋八月震澤楊復吉書

例言

舊五代史厲氏未見固無論已至他書所載若道宗圖韓忠彥之像敕邊吏之無開邊釁皇后生產儀高麗王語宋醫之辭胥皆佚漏殊不可解今備錄於左於厲氏似不無小補云

厲氏於本紀則摘錄原文分段補注志傳國語解舊有者標其名目補綴事實新增者另立名目下繫補字今悉遵其例惟於厲氏所增者下注拾遺補字厲氏未備余所增者下注續補字

地理志屬國表國語解厲氏所引用後人著述與遼

史不相附麗者間亦闌入余此編則必擇其有涉於  
遼始爲采錄

引用諸書於初見則標著書人姓氏再見三見則不  
更列以識別亦舊例也

遼史拾遺補卷一

震澤楊復古列歐輯

本紀第一太祖上

明年七月○唐河東節度使李克用遣通事德乞盟冬十月太祖以騎兵七萬會克用于雲州宴酣克用借兵以報劉仁恭木瓜澗之役太祖許之易袍馬約爲兄弟

薛居正舊五代史曰天祐四年大寇雲中後唐武皇遣使連和因與之面會于雲中東城大具享禮延入帳中約爲兄弟謂之曰唐室爲賊所篡吾欲今冬大

舉弟可以精騎二萬同收汴洛阿保機許之賜與甚厚畱馬三千匹以答貺左右咸勸武皇可乘間虜之武皇曰逆賊未殄不可失信于部落自亡之道也乃盡禮遣之

復古案雲中之會遼史在天祐二年乙丑舊五代史在天祐四年丁卯史文互異未知孰是

十一月遣偏師討奚霫諸部及東北女直之未附者悉破降之

趙志忠北廷雜記曰太祖一舉并吞奚國仍立奚人依舊爲奚王命契丹監督兵甲

元年春正月庚寅命有司設壇于如迂王集會塢燔柴告天卽皇帝位○北宰相蕭轄刺南宰相耶律歐里思率羣臣上尊號曰天皇帝

舊五代史曰天祐末阿保機乃自稱皇帝署中國官號其俗舊隨畜牧素無邑屋得燕人所教乃爲城郭宮室之制于漠北距幽州三千里名其邑曰西樓邑屋門皆東向如車帳之法城南別作一城以實漢人名曰漢城城中有佛寺三僧尼千人國人號阿保機爲天皇王○葉隆禮契丹國志曰契丹國在庫莫奚東唐所謂黑水靺鞨者今其地也有七十二部落不

相統制好爲寇盜父母死而悲哭者以爲不壯但以  
其尸置于山樹上經三年後乃收其骨而焚之因酌  
酒而祝曰冬月時向陽食夏月時向陰食我若射獵  
時使我多得豬鹿其無禮頑嚚於諸夷最甚其風俗  
與奚靺鞨同至阿保機稍并服諸小國而多用漢人  
漢人教之以隸書之半增損之作文字數千以代刻  
木之約又制婚嫁置官號稱皇帝

六年○二月戊午親征劉守光三月至自幽州

舊五代史曰劉守光末年苛慘軍士亡叛皆入契丹  
洎周德威攻圍幽州燕之軍民多爲所寇掠旣盡得



燕中人士教之文法由是漸盛

神冊○二年○三月辛亥攻幽州○秋八月李存勗遣李嗣源等救幽州曷魯等以兵少而還

舊五代史曰十四年契丹乘勝攻幽州是時或言契丹三十萬或言五十萬幽薊之北所在北騎皆滿莊宗遣明宗與李存審閻寶將兵救幽州遂解其圍○歐陽修新五代史曰德威走幽州契丹圍之所得漢人以長繩連頭繫之於木漢人夜多自解逃去

本紀第二太祖下

六年○十二月○庚申皇太子率王郁略地定州○乙

亥存勗至定州王都迎謁馬前存勗引兵■望都遇我  
軍禿餒五千騎圍之存勗力戰數四不解李嗣昭領三  
百騎來救我軍少卻存勗乃得出大戰我軍不利引歸  
舊五代史曰十八年十二月莊宗在鎮州行營聞前  
鋒報契丹渡沙河軍中咸恐議者請權釋鎮州之圍  
以避之莊宗曰霸王舉事自有天道契丹其如我何  
國初突厥入寇至於渭北高祖欲棄長安遷都樊鄧  
太宗曰獫狁孔熾未聞遷移都邑霍去病漢廷將帥  
猶且志滅匈奴況帝王應運而欲移都避寇哉文皇  
雄武不數年俘二突厥爲衛士今吾以數萬之衆安

集山東王德明廝養小人阿保機生長邊地豈有退避之理吾何面視蒼生哉爾曹但駕馬同行看吾破之莊宗親御鐵騎五千至新城北遇契丹前鋒萬騎莊宗精甲自桑林突出光明照日諸部愕然緩退莊宗分二廣以乘之北騎散退時沙河微冰其馬多陷阿保機退保望都

天贊○四年○五月○冬十月

司馬光資治通鑑曰同光二年五月幽州言契丹將入寇甲寅以橫海節度使李紹斌充東北面行營招討使將大軍度河而北契丹屯幽州東南城門之外

虜騎充斥饋運多爲所掠○八月契丹攻渤海無功而還丁巳幽州言契丹入寇○冬十月易定言契丹入寇

天顯元年○六月○唐遣姚坤以國哀來告

舊五代史曰阿保機問姚坤漢收得西川信否坤曰去年九月出兵十一月十六日收下東西川得兵馬二十萬金帛無算皇帝初卽位未辦送來續當遣使至矣阿保機忻然曰聞西有劒閣兵馬從何過得坤曰川路雖險然先朝收復河南有精兵四十萬良馬十萬騎但通人行處便能去得視劒閣如平地耳阿

保機善漢語謂坤曰吾解漢語歷口不敢言懼部人效我令兵士怯弱故也

本紀第三太宗上

五年○十一月戊寅東丹奏人皇王浮海適唐

舊五代史曰東丹王突欲在闕下其母繼發使申報朝廷亦優容之

六年春正月

資治通鑑曰長興三年正月契丹陷平州

元年冬盧文進來奔

唐得平州至是復爲契丹所陷

七年○十一月

遼史拾遺補

卷一

五

抄經堂校刊

舊五代史曰張敬達遷雲州節度使時以契丹率族帳自黑榆林至云借漢界水草敬達每聚兵塞下以遏其衝契丹竟不敢南牧邊人賴之

十一年○秋七月○丙申唐河東節度使石敬瑭爲其主所討遣趙瑩因西南路招討盧不姑求救上白太后曰李從珂弑君自立神人共怒宜行天討○八月○庚午自將以援敬瑭○九月○丁酉入鴈門○己亥次太原

舊五代史曰清泰三年晉高祖爲張敬達等攻圍甚急遣指揮使何福齋表乞師願爲臣子德光白其母

曰兒昨夢太原石郎發使到國今果至矣事符天意  
必須赴之德光乃自率五萬騎由鴈門至晉陽

癸卯圍晉安

資治通鑑曰九月契丹主移帳於柳林遊騎過石會  
關不見唐兵

閏月甲子○所降軍士及馬五千匹以賜晉帝

資治通鑑曰時晉安寨馬猶近五千鎧仗五萬契丹  
悉取以歸其國以唐之將卒授帝語之曰勉事而主  
壬申○晉帝辭歸上與宴飲酒酣執手約爲父子○命  
迪離畢將五千騎送入洛臨別謂之曰朕畱此候亂定

乃還耳

資治通鑑曰帝將發上黨契丹主舉酒屬帝曰我若南向河南之人必大驚駭汝宜自引漢兵南下人必不甚懼有急則下山救汝若洛陽既定吾卽北反矣又曰劉知遠趙瑩桑維翰皆創業功臣無大過勿棄也

本紀第四太宗下

會同元年○秋七月○丁卯○遣梅里了古使南唐

陸游南唐書曰烈祖昇元二年契丹主耶律德光及其弟東丹王各遣使以羊馬入貢別持羊三萬口馬



三百匹來鬻以其價市羅紉茶藥烈祖從之於是翰林院進二丹入貢圖詔中書舍人江文蔚作贊

戊辰遣中臺省右相耶律述蘭迭烈哥使晉臨海軍節度使趙思溫副之冊晉帝爲英武明義皇帝

新五代史曰冬十月契丹遣中書令韓頗來奉冊曰

英武明義皇帝

何焯讀書記曰梁唐皆郊見後受尊號石晉則以契丹爲天矣

○路

振九國志曰晉天福中契丹使至朝廷以近侍李泳爲監伴使有判官幽冀人謂泳曰吳越王常不睡乎詰其故答曰嘗聞五臺山王子大師曰浙中不睡龍今已歸矣

三年春正月

秦再思洛中紀異曰王昶旣爲朝命所責乃遣使越海聘於契丹卽將藉沒之物爲贄晉祖方卑辭以奉戎主戎主降僞詔曰閩國禮物竝付喬榮放其使人還本國晉主不敢拒之旣而昶又遣使於契丹求馬由滄濟淮甸路南去自茲往復不一時人無不憤惋八月○壬寅遣使南唐

南唐書曰昇元四年德光遣使獻馬百匹於是烈祖遣通事舍人副四方館事歐陽遇借鴻臚少卿使契丹假道於晉高祖不可遇及境而復○資治通鑑曰

唐自烈祖以來常遣使泛海與契丹相結欲與之共制中國更相餽遺約爲兄弟然契丹利其貨徒以虛語往來實不爲唐用也

五年○夏四月

資治通鑑曰夏四月契丹以晉招納吐谷渾遣使來讓

七年春正月○己卯趙延壽圍貝州其軍校邵珂開南門納遼兵太守吳巒投井死

舊五代史曰巒權知貝州軍州事天福九年正月契丹大至其一日大譟環其城明日陳攻具於四壙三

日契丹主躬率步奚及渤海奚等四面進攻鬱衆投薪於夾城中繼以炬火敵之梯衝焚蕪殆盡

二月

資治通鑑曰開運元年二月馬全節攻契丹泰州拔之

三月○壬午畱趙延昭守貝州徙所俘戶於內地夏四月癸丑還次南京

契丹國志曰時遼帝帳中有小校亡來曰遼帝已傳木書收軍北去景延廣疑爲詐閉壁不敢追○資治通鑑曰夏四月契丹遣兵救青州齊州防禦使薛可

言邀擊敗之丁亥鄴都畱守張從恩上言趙延照雖據貝州麾下兵皆久客思歸宜速進軍攻之詔以從恩爲貝州行營都部署督諸將擊之辛卯從恩奏趙延照縱火大掠棄城而遁屯於瀛莫阻水自固

八年春正月

資治通鑑曰開運二年春正月皇甫遇等還契丹亦引去軍退其衆自相驚曰晉軍悉至矣時契丹主在邯鄲聞之卽時北遁不再宿至鼓城是夕張從恩引兵先發諸軍繼之畱步兵五百守安陽橋夜四鼓知相州事符彥倫召入乘城爲備至曙望之契丹數萬

騎已陳於安陽水北彥倫命城上揚旌鼓譟約束契丹不測日加辰趙延壽與契丹惕隱帥衆踰水環相州而南詔右神武統軍張彥澤將兵趣相州延壽至湯陰聞之甲寅引還馬全節等擁大軍在黎陽不敢追延壽悉陳甲騎於相州城下若將攻城狀符彥倫曰此虜將走耳出甲卒五百陳於城北以待之契丹果引去

秋七月乙卯○晉遣孟守中奉表請和仍以前事答之契丹國志曰六月晉遣使如遼○舊五代史曰是時契丹連歲入寇晉氏疲於奔命邊民被苦幾無寧日

晉相桑維翰勸少帝求和於契丹以紓國難少帝許之乃遣使奉表稱臣卑辭首過使回德光報曰但使桑維翰景延廣自來竝割定鎮與我則可通和也朝廷知其不可乃止○契丹國志曰帝入大梁謂李崧等曰向使晉使再來則南北不戰矣

九年○八月○自將南伐

資治通鑑曰開運三年八月李守貞言與契丹千餘騎遇於長城北轉鬪四十里斬其酋帥解里擁餘衆入水溺死者甚衆

九月○十一月○丙申○南院大王迪輦將軍高模翰

遼史拾遺補

卷一

十 振綺堂校刊

分兵由瀛州間道以進杜重威遣其將節度使梁漢璋率衆來拒與戰大敗之殺梁漢璋

資治通鑑曰九月契丹三萬寇河東壬辰劉知遠敗之於陽武谷斬首七千級丙辰契丹使瀛洲刺史劉延祚遣樂壽監軍王巒書請舉城內附且云城中契丹不滿千人乞朝廷發輕兵襲之已爲內應又今秋多雨自瓦橋以北積水無際契丹主已歸牙帳雖聞關南有變地遠阻水不能救也巒與天雄節度使兼中書令杜威屢奏瀛莫可取深州刺史慕容遷獻瀛莫圖馮玉李崧信以爲然欲發大兵迎趙延壽及延



祚冬十月以杜威爲北面行營都指揮使以守貞爲  
兵馬都監十一月丁酉以李守貞權知幽州行府事  
己亥杜威等至瀛州城門洞啟寂若無人威等不敢  
進聞契丹將高模翰先已引兵潛出威遣梁漢璋將  
二千騎追之遇契丹於南陽務敗死威等聞之引兵  
而南時東城等數縣請降威等焚其廬舍掠其婦女  
而還

杜重威張彥澤引兵據中渡橋

賈緯賈氏備史曰彥澤狼子其心密已變矣乃通款  
耶律氏誘爲前導因促騎說威引軍沿滹沱水西援

遼史拾遺補

卷一

十一

振綺堂校刊

常山及至眞定東垣渡與威通謀先遣步衆跨水不  
之救致敗將沮人心以行詭計因從監者高勳請降  
於虜

趙延壽以步卒前擊高彥溫以騎兵乘之追奔逐北僵  
尸數萬

舊五代史曰契丹尋於所戰之地築一京觀及漢高  
祖卽位使人平之

十二月

舊五代史曰十二月十二日德光入鎮州大犒將士  
十四日自鎮州南行中渡降軍所釋甲仗百萬計竝

令於鎮州收貯戰馬數萬匹長驅而北

壬午次赤岡重貴舉族出封丘門橐索牽羊以待上不  
忍臨視命改館封禪寺

契丹國志曰晉主迎於封丘門外帝辭不見館於封  
禪寺遣其將崔延勳以兵守之帝至明德門下馬  
拜而後入晉宮中嬪妃迎謁皆不顧日暮復出屯於  
赤岡

大同元年春正月

資治通鑑曰天福十二年春正月乙未契丹主分遣  
使者以詔書賜晉之藩鎮晉之藩鎮爭上表稱臣被

召者無不奔馳而至 契丹主廣受四方貢獻大縱  
酒作樂每謂晉臣曰中國事我皆知之吾國事汝曹  
不知也 昭義節度使張從恩以地迫懷洛欲入朝  
於契丹判官高防諫曰公晉室懿親不可輕變臣節  
從恩不從左驍衛大將軍王守恩與從恩姻家時在  
上黨從恩以副使趙行遷知畱後牒守恩權巡檢使  
與高防佐之 荆南節度使高從誨遣使入貢於契  
丹契丹遣使以馬賜之

癸卯○送負義侯及其母李氏 缺妃 缺氏妻馮氏弟重  
睿子延煦延寶等於黃龍府安置

舊五代史曰嘗一日帝與太后不能得食乃殺畜而啖之至幽州傾城士庶迎看於路見帝慘沮無不嗟歎駐畱旬餘州將承契丹命犒帝於府署趙延壽母以食饌來獻

## 二月

資治通鑑曰二月契丹以劉愿爲保義節度副使陝人苦其暴虐奉國都頭王晏與指揮使趙暉都頭侯章謀已巳晏與壯士數人夜踰牙城入府出庫兵以給衆庚午旦斬愿首懸諸府門又殺契丹監軍奉暉爲畱後辛巳高防與王守恩謀遣指揮使李萬超白

書帥衆大譟入府斬趙行遷推守恩權知昭義畱後  
守恩殺契丹使者舉衆來降 丹州都指揮使高彥  
珣殺契丹所署刺史自領州事三月壬辰以丹州來  
降 統軍劉遂凝因王淑妃求節鉞契丹主以唐郇  
公從益爲許王威信節度使遂凝爲安遠節度使

三月丙戌朔

新五代史曰三月丙戌朔德光服韠袍御崇元殿百  
官入閣德光大悅顧其左右曰漢家儀物其盛如此  
我得於此殿坐豈非眞天子耶

以蕭翰爲宣武軍節度使

舊五代史曰明年春二月朔降東京爲防禦州尋復爲宣武軍

壬寅晉諸司僚吏嬪御宦寺方技百工圖籍歷象石經銅人明堂刻漏太常樂譜諸宮縣鹵簿法物及鎧仗悉送上京

錢大昕金史考異曰劉彥宗傳云遼太宗入汴載路車法服石經以歸按漢魏之石經在洛陽唐之石經在京兆汴都無石經也汴都石經宋嘉祐所刻在遼入汴以後彥宗所云殊未足信或云石經當是石鼓之譌

磁州帥梁暉以相州降漢已酉命高唐英討之夏四月  
丙辰朔發自汴州以馮道李崧和凝李漣徐台符張礪  
等從行次赤岡夜有聲如雷起於御幄大星復隕於旗  
鼓前乙丑濟黎陽渡

王仁裕玉堂閒話曰三月十七日契丹主自汴而北  
是日路次赤岡日過晡忽廬帳中有聲殷殷然若雷  
起於地下契丹主懼召術者占之術者給云此土地  
神所作乃命祭禱焉○資治通鑑曰三月辛亥契丹  
主將攻相州梁暉請降契丹主赦之許以爲防禦使  
暉疑其詐復乘城拒守夏四月己未未明契丹主命



蕃漢諸軍急攻相州食時克之悉殺城中男子驅其  
婦女而北胡人擲嬰孩於空中舉刃接之以爲樂或  
告磁州刺史李穀謀舉州應漢契丹主執而詰之穀  
不服契丹主引手於車中若取所獲文書者穀知其  
詐請曰必有其驗乞顯示之凡六詰穀辭氣不屈乃  
釋之○脫脫等宋史李穀傳曰潛遣河朔酋豪梁暉  
入據安陽契丹主患之卽謀北旋會有告契丹以城  
中虛實者契丹還攻安陽陷其城○資治通鑑曰冀  
州人殺契丹刺史何行通推牢城指揮使張廷翰知  
州事

丁丑崩於欒城

舊五代史曰四月十六日次於欒城縣殺虎林之側時德光已得寒熱疾數日矣命部人齋酒脯禱於得疾之地十八日晡時有大星落於穹廬之前若迸火而散德光見之西望而唾連呼曰劉知遠滅劉知遠滅是月二十一日卒

本紀第五世宗

世宗孝和莊憲皇帝諱阮小字兀欲

資治通鑑曰兀欲眇一目爲人雄健好施○新五代史曰突欲奔於唐兀欲畱不從號永康王

大同元年四月丁丑太宗崩於樂城戊寅梓宮次鎮陽  
卽皇帝位於柩前甲申次定州命天德朔古解里等護  
梓宮先赴上京太后聞帝卽位遣太弟李胡率兵拒之  
資治通鑑曰兀欲集蕃漢之臣於府署宣契丹主遺  
制卽皇帝位於是始舉哀成服旣而易吉服見羣臣  
不復行喪歌吹之聲不絕於內 兀欲慕中華風俗  
多用晉臣而荒於酒色輕慢諸酋長由是國人不附  
諸部數叛興兵誅討故數年之間不暇南寇○契丹  
國志曰太后聞帝立怒曰我兒南征東討有大功業  
其子在我側者當立汝父棄我走投外國乃大逆人

也豈得立逆人之子爲帝乎發兵拒之○舊五代史  
曰車駕至絳州刺史李從朗以郡降初契丹遣偏校  
成霸卿曹可璠等守其郡及車駕至從朗等遂降○  
資治通鑑曰麻荅被逐楊安亦遁李殷以其衆來降

天祿○二年

契丹國志作  
天祿元年

資治通鑑曰初契丹主北歸至定州以義武節度副  
使耶律忠爲節度使徙故節度使孫方簡爲大同節  
度使方簡怨恚且懼入朝爲契丹所畱遷延不受命  
帥其黨三千人保狼山故寨控守要害契丹攻之不  
克未幾遣使請降帝復其舊官以扞契丹耶律忠聞

鄴都既平常懼華人爲變詔以成德畱後劉在明爲幽州道馬步都部署使出兵經略定州未行忠與麻荅等焚掠定州悉驅其人棄城北去孫方簡自狼山帥其衆數百還據定州又奏以弟行友爲易州刺史方遇爲泰州刺史每契丹入寇兄弟奔命契丹頗畏之於是晉末州縣陷契丹者皆復爲漢有矣○舊五代史曰三月二十七日契丹棄定州墮城壁焚室廬盡驅人民入蕃惟餘空城瓦礫而已 永康王至遼陽帝與太后竝詣帳中帝御白衣紗帽永康王止之以常服謁見帝伏地雨泣自陳過咎永康王使左右

扶帝上殿慰勞久之因命設樂行酒從容而罷永康王帳下從官及教坊內人望見故主不勝悲咽內人皆以衣帛藥餌獻遺於帝及永康王發離遼陽取內官十五人東西班十五人及皇子延煦竝令隨帳上陁○契丹國志曰六月朔日食 陁北地尤高涼北人常以五月上陁避暑八月下陁至八月帝下陁太后自馳至霸州謁帝求於漢兒城側賜地種收以爲生許之帝以太后自從行十餘日遣與延煦俱還遼陽○張庚通鑑釋地糾繆曰通鑑註陁北冷陁山之北也按冷陁山在今兀良哈境○舊五代史曰滄州

上言七月後幽州界投來人口凡五千一百四十七  
北土饑故也○毛奇齡西河詩話曰塞北有吐兒山  
在黑山東北遼主避暑之地

三年○夏六月

契丹國志曰夏四月太白晝見○六月朔日食

秋九月辛丑朔召羣臣議南伐冬十月遣諸將率兵攻  
下貝州高老鎮徇地鄴都南宮堂陽殺深州刺史史萬  
山

資治通鑑曰乾祐二年十月契丹寇河北所過殺掠  
節度使刺史各嬰城自守遊騎至貝州及鄴都之北

境帝憂之己丑遣樞密使郭威督諸將禦之十一月契丹聞漢兵渡河乃引去○舊五代史曰先是契丹入邊萬山城守郭威遣索萬進率騎七百屯深州一日契丹數千騎迫州東門萬山父子率兵百餘人襲之契丹僞退十餘里而伏兵發萬山血戰急請救於萬進萬進勒兵不出萬山死之契丹亦解去

四年○冬十月自將南伐攻下安平內丘東鹿等城大獲而還

舊五代史曰鎮州邢州馳奏契丹寇洺州陷內丘縣時契丹永康王兀欲率部族兩道入邊內丘城小而



固契丹攻之五日不下敵人傷者甚衆時有官軍五百在城防戍攻急官軍降於敵屠其城而去○契丹國志曰十一月朔日食

五年春正月○漢郭威殺其主自立國號周遣朱憲來告卽遣使致良馬

王溥五代會要曰周廣順元年正月太祖命左千牛衛將軍朱憲往修和好永康王亦遣使報命獻良馬四匹太祖復遣尚書左丞田敏供奉官蔣光遂銜命往聘其年四月田敏等回永康王遣使獻碧玉金鑲銀裏鞍轡并馬四十匹

六月辛卯朔劉崇爲周所攻遣使稱姪乞援且求封冊  
卽遣燕王牒螭樞密使高勳冊爲大漢神武皇帝

資治通鑑曰初契丹主北歸橫海節度使潘聿撚棄  
鎮隨之契丹主以聿撚爲西南路招討使及北漢主  
立契丹主使聿撚遺劉承鈞書○四月契丹主遣使  
如北漢告以周使田敏來約歲輸錢十萬緡北漢使  
鄭珙以厚賂謝契丹

本紀第六穆宗一

應歷○三年

資治通鑑曰廣順三年正月契丹寇鎮州本道兵擊

走之

九月

資治通鑑曰九月契丹寇樂壽齊州戍兵右保寧都頭劉漢章殺都監杜延熙謀應契丹不克并其黨伏誅

四年

資治通鑑曰顯德元年三月楊衮將其衆北屯代州北漢主遣王得中送衮因求救於契丹契丹遣得中還報許發兵救晉陽

九年○夏四月丙戌周來侵○是月周拔益津瓦橋淤

口三關五月乙巳朔陷瀛莫二州

資治通鑑曰契丹主遣使者日馳七百里詣晉陽命北漢主發兵撓周邊聞上南歸乃罷兵孫行友奏拔易州擒契丹刺史李在欽獻之斬於軍市以瓦橋關爲雄州益津關爲霸州

十年○夏五月

王偁東都事略曰顯德七年與河東連兵寇鎮定恭帝命太祖北征俄聞太祖卽位驚曰中國有英主矣於是遁去○契丹國志曰夏五月朔日食

十三年○八月○十二月

薛應旂宋元通鑑曰乾德元年八月王全斌攻取北漢樂平契丹救之不及○吳任臣十國春秋曰漢天會七年十二月遼主遣書來責帝遣繼文謝曰父爲子隱願赦之自是遼使不來而使往輒見畱羣臣悉以使北爲懼

本紀第八景宗一

改元保寧

契丹國志曰遼大赦境內刑賞政事用兵追討皆皇后決之帝臥牀榻間拱手而已

三年○夏四月

契丹國志曰夏四月朔日食

四年○冬十月

契丹國志曰冬十月朔日食

五年○九月

契丹國志曰秋九月朔日食

七年

契丹國志作  
乾亨元年

○二月

契丹國志曰春二月朔日食○宋史曰開寶八年八

月壬戌契丹遣左衛大將軍耶律霸德等致御衣玉

帶名馬 十二月甲子契丹遣使耶律烏正來賀正

旦

八年

契丹國志作  
乾亨二年

○二月

宋史曰開寶九年二月辛亥契丹遣使耶律延寧以御衣玉帶名馬散馬白鶻來賀長春節

本紀第九景宗二

九年

契丹國志作  
乾亨三年

○十一月

宋史曰太平興國二年十一月甲午遣李瀆等賀契

丹正旦

十年

契丹國志作  
乾亨四年

○五月

宋史曰太平興國三年五月癸巳遣李從吉等使契丹  
冬十月癸丑朔契丹遣使來賀乾明節○錢大

昕遼史考異宋奉使諸臣年表曰十一月供奉官閣  
門祇候吳元載太常寺太祝母賓古賀契丹正旦○  
宋史曰十二月戊寅契丹遣使來賀正旦

乾亨元年

契丹國志  
作六年

○六月○宋主來侵丁卯北院大

王奚底統軍使蕭討古乙室王撒合擊之戰於沙河失  
利己巳宋主圍南京丁丑詔諭耶律沙及奚底討古等  
軍中事宜秋七月癸未沙等及宋兵戰於高粱河少卻  
休哥斜軫橫擊大敗之宋主僅以身免至涿州竊乘驢  
車遁去

契丹國志曰六月涿州判官劉德厚以城降宋○宋



史曰太平興國四年六月壬申契丹鐵林廂主李札  
盧存以所部來降 癸酉幽州神武廳直并鄉兵四  
百人來降乙亥范陽民以牛酒犒師 秋七月庚辰  
契丹建雄軍節度使知順州劉廷素來降壬午知薊  
州劉守恩來降○王鞏聞見近錄曰前此柴世宗畫  
御河爲界虜未嘗敢犯邊自爾日尋干戈至眞宗皇  
帝澶淵之幸方息御河蓋世宗運漕河也○王得臣  
麀史曰富鄭公嘗爲余言永熙討河東劉氏旣下并  
州欲領師乘勝收復薊門始咨於衆參知政事趙昌  
言對曰自此取幽州猶熱鐵翻餅耳殿前都指揮使

呼延贊爭曰書生之言不足盡信此餅難翻永熙竟趨幽燕卷甲而還卒如贊言鄭公再三歎謂余曰武臣中蓋亦有人矣

九月○十一月

宋史曰九月丙午鎮州都鈐轄劉延翰及契丹戰於遂城西大敗之斬首萬三百級獲三將馬萬匹十一月辛卯忻州言與契丹戰破之關南言破契丹斬首萬餘級

二年

契丹國志作七年

○三月

宋元通鑑曰太平興國五年三月契丹兵十萬寇鴈

門楊業領麾下數百騎自西徑出至鴈門北口南向  
擊之契丹兵大敗殺其節度使駙馬侍中蕭咄李獲  
都指揮李重誨

十一月

契丹國志曰冬十一月帝發兵萬餘衆進攻關南宋  
河陽節度使崔彥進將兵禦之遼師失利○東都事  
略曰明年寇雄州太宗復北征師次大名遂遁去

三年

契丹國志作八年

○五月

契丹國志曰遼大赦○宋史曰太平興國六年春正  
月辛亥易州破契丹數千衆 五月平塞軍與契丹

戰破之○契丹國志曰秋九月朔日食○宋史曰九月丙辰易州言破契丹

四年

契丹國志作九年

○三月

契丹國志曰春三月朔日食

五月

宋史曰太平興國七年五月辛丑崔彥進敗契丹於唐興 辛亥三交行營言潘美敗契丹之師於鴈門破其壘三十六 己未府州破契丹於新澤砦獲其將校以下百人

本紀第十聖宗一

十二月

契丹國志曰冬十二月朔日食○宋史曰閏月戊子朔豐州與契丹戰破之獲其天德軍節度使蕭太

統和元年○三月

宋史曰太平興國八年三月庚申豐州破契丹兵降三千餘帳

三年

契丹國志曰冬十二月朔日食

本紀第十二聖宗三

六年○十一月

宋史曰端拱元年十一月己丑郭守文破契丹於唐河

七年○秋七月○癸巳遣兵南征

釋文瑩玉壺清話曰淳化中著作郎孫崇諫陷北歸太宗召見面詰虜廷事崇諫備奏尹繼倫唐河之役上始盡知歎曰奏邊者忌其功不狀其實以昧朕非卿安知遽加防禦使

本紀第十三聖宗四

十一年○八月

契丹國志曰秋八月朔日食

十三年○十二月

宋元通鑑曰至道元年冬十二月契丹韓德威謀知折御卿有疾遂率衆犯邊以報子河汭之役御卿力疾禦之德威聞其至不敢進

本紀第十四聖宗五

十七年○九月

宋史曰咸平二年九月鎮定都部署言敗契丹兵於廉良路殺獲甚衆

冬十月

宋元通鑑曰咸平二年冬十月契丹掠祁趙邢洺州

遂自德棣濟河掠淄齊○契丹國志曰冬十二月攻  
宋爲冀州張旻敗於城南○東都事略曰咸平二年  
大寇鎮定眞宗親征次大名知府事折御昌等引兵  
入五合川破拔黃太尉砦○宋史曰冬十二月契丹  
攻威虜軍本軍擊敗之殺其酋帥○王闢之澠水燕  
談曰王樵字肩望淄川人咸平中契丹內寇舉族北  
俘潛入敵中訪其親累年乃歸持諸喪刻木爲親葬  
奩山東

十八年春正月還次南京

宋元通鑑曰咸平三年春正月己卯朔契丹知帝親



征乃縱掠而去丁亥范廷召等追取契丹於莫州斬首萬餘級盡獲所掠餘寇遁出境庚子帝至白大名二十年○秋七月

宋史曰咸平五年秋七月壬戌契丹大林砦使王昭敏等來降

二十二年○十一月○丁丑宋遣崇儀副使曹利用請和卽遣飛龍使韓杞持書報聘○十二月○癸未宋復遣曹利用來以無還地之意遣監門衛大將軍姚東之持書往報

宋元通鑑曰景德元年十一月己未契丹逼冀州知

州王瑱擊走之○東都事略曰契丹假王繼忠爲書抵莫州請和眞宗謂宰相畢士安等曰和戎之利自古有之然夷狄變詐未可信也士安等曰比來降虜皆言國中恐復有幽燕之舉又銳氣屢挫而退歸無名其請和固不爲疑於是遣右班殿直曹利用持書答之然虜益進攻圍瀛州利用至大名知府事王欽若畱不遣眞宗北征繼忠又奏契丹兵不敢劫掠以待王人而王人不至乃詔欽若遣利用○陳師道後山談叢曰始講和遼使韓杞匿其善飲曰兩國初好數杯之後一言有失所誤非細後使姚東之旣去而

顧手額再三是以知虜之情也姚叟之曰守之事力契丹之士馬皆盛然北軍用於阻隘不能敵南平原馳突南軍亦不能支也○孔平仲孔氏談苑曰程戡侍郎自言爲御史時接伴北人帳張觀中丞教之曰待之以禮答之以簡戡佩服其言或云不然北人見語簡便生疑心極惱人不若曠然以誠接之

己丑詔諸軍解嚴是月班師

東都事略曰眞宗謂輔臣曰初欲令楊延朗邀其歸路而以精兵踵其後腹背擊之可無噍類矣然兵連禍結何時已哉故徇其請以休息天下之民若彼自

渝盟以順代逆覆亡之殆未晚也明年令雄霸州安肅軍置榷場以通其貿易自此交遣使賀生日及正旦歲以爲常仍遺以銀絹三十萬

二十四年

遼史考異宋奉使諸臣年表曰三月兵部員外郎直史館任中正西上閤門使獎州刺史李繼昌賀國母生辰○契丹國志曰宋景德中太常博士王曙戶部員外郎李維往賀國主生辰還言國主見漢使強襲衣冠事竟卽幅巾雜番騎射獵矣○澠水燕談曰景德中朝廷始與契丹通好詔遣使將以北朝呼之王

沂公以爲太重請但稱契丹本號可也眞宗激賞再三朝論黷之○耶律楚材湛然居士集懷古詩註曰昔宋事遼爲兄仍請隨代以序昭穆至末年遼爲翁宋爲孫

二十五年春正月建中京

東都事略曰又明年置中京於七金山下其地本奚王牙帳也○遼史考異宋奉使諸臣年表曰三月戶部副使水部員外郎崔端侍禁閣門祇候張利用賀國母生辰

九月

遼史考異宋奉使諸臣年表曰九月戶部副使祠部  
郎中宋搏供奉官閣門祇候馮若拙賀國母正旦著  
作郎直史館陳知微供奉官閣門祇候王承僕賀國  
主正旦戶部判官殿中丞滕涉侍禁閣門祇候劉煦  
賀國主生辰

二十六年

遼史考異宋奉使諸臣年表曰三月都官員外郎喬  
希顏供奉官閣門祇候景元賀國母生辰○九月御  
史馬亮西京作坊使魏昭易賀國母正旦都官員外  
郎孫奭侍禁閣門祇候薛貽廓賀國主正旦

十二月

宋史曰大中祥符元年十二月壬子契丹使上將軍蕭智可等來賀○晁公武郡齋讀書後志曰乘輅錄一卷皇朝路振子發撰振大中祥符初使契丹撰此書以獻事見其傳○吳處厚青箱雜記曰陝州魏處士野贈寇萊公詩云有官居鼎鼎無地起樓臺播傳漠北章聖朝北使至問那个是無地起樓臺相公時寇居散地因召還○葉澣綱鑑會編曰從東封還改準戶部尚書知天雄軍契丹使嘗過大名謂準曰相公望重何故不在中書準曰主上以朝廷無事北門

鎖鑰非準不可耳

二十七年

遼史考異宋奉使諸臣年表曰二月太常博士直史館王隨供奉官閣門祇候王承瑾賀國母生辰○宋史曰大中祥符二年九月命工部侍郎馮起爲契丹國信使

本紀第十五聖宗六

二十八年○冬十月

遼史考異宋奉使諸臣年表曰十月右司諫直史館李迪內園副使崔可道賀國主生辰監察御史乞伏



矩供奉官閤門祇候翟繼思賀正旦

二十九年○三月己卯大丞相晉國王耶律隆運薨

契丹國志曰丞相耶律隆運本漢人姓韓名德讓太  
后有辟陽之幸賜姓耶律改名隆運尋拜大丞相封  
晉王景宗崩太后臨朝隆運私侍之是時太后年方  
三十諸子尚幼外無親援雄傑角立帝登大寶皆隆  
運力也帝念其功父事之隆運薨帝爲制服其終始  
眷遇如此○遼史考異宋奉使諸臣年表曰九月工  
部郎中龍圖閣待制張知白崇儀副使薛惟正賀國  
主生辰

開泰元年○冬十月

遼史考異宋奉使諸臣年表曰十月主客郎中知制誥王曾宮苑使榮州刺史高繼勳賀國主生辰屯田郎中兼侍御史知雜事李士龍內殿崇班閣門祇候李餘懿賀正旦

三年○六月

契丹國志曰夏六月朔日食○遼史考異宋奉使諸臣年表曰九月殿中侍御史周實西京作坊副使段守倫賀國主生辰屯田員外郎趙世長內殿崇班閣門祇候張舜臣賀正旦

四年

遼史考異宋奉使諸臣年表曰九月左司諫知制誥  
劉筠供奉官閣門祗候宋德文賀國主生辰戶部副  
使吏部員外郎李及侍禁閣門祗候李居中賀正旦  
本紀第十六聖宗七

太平○二年

遼史考異宋奉使諸臣年表曰八月屯田員外郎王  
駸西頭供奉官閣門祗候劉懷德賀正旦

四年○秋七月

遼史考異宋奉使諸臣年表曰七月刑部郎中直史

館章得象供奉官閣門祗候馮克忠賀國后生辰

本紀第十七聖宗八

五年○冬十月

契丹國志曰冬十月朔日食

十二月

宋元通鑑曰天聖三年契丹大閱聲言獵幽州張知  
白曰契丹修好未遠今以上初政試觀朝廷耳未幾  
契丹果罷去

六年○九月

遼史考異宋奉使諸臣年表曰九月右諫議大夫權

三司使范雍東染院使侯繼隆賀國主生辰

七年春正月壬寅朔宋遣張保維孫繼業孔道輔馬崇至來賀

曾鞏隆平集曰孔道輔使契丹虜主酌以大卮曰方天寒飲此可以致和氣道輔曰不和固無害及還言者以爲開虜爭端他日上問之對曰契丹新爲黑水所破勢甚蹙平時漢使至多以言相侮若不答恐益愠中國上然之○契丹國志曰春三月朔日食

夏四月

契丹國志曰夏四月有星大如斗聲如雷自北流於

西南光燭天下尾長數丈久之散爲蒼白雲

八年○三月

契丹國志曰春三月契丹饑流民之宋境上宋仁宗曰皆吾赤子也詔給以唐鄧州閒田仍令所過州縣給食 秋八月朔日食

九年○秋七月○八月

遼史攷異宋奉使諸臣年表曰七月刑部郎中狄棐作坊使陳宗憲賀國后生辰○八月職方員外郎判三司理欠司張羣如京副使石元孫賀國主正旦戶部判官度支員外郎蘇耆內殿承制閣門祗候王德

賀國后生辰

十年○秋七月

遼史攷異宋奉使諸臣年表曰七月鹽鐵判官兵部  
員外郎直史館張宗象香藥庫使李渭賀國后生辰

遼史拾遺補卷一



遼史拾遺補卷二

震澤楊復古列歐輯

本紀第十八興宗一

重熙○四年

澠水燕談曰景祐中蔡君謨作四賢一不肖詩布在都下人爭傳寫契丹使適至買以歸張於幽州館

五年

遼史攷異宋奉使諸臣年表曰八月工部郎中判戶部句院李宗詠供奉官閣門祗候岸準賀國主正旦九年

宋史曰康定元年夏四月乙未契丹國母復遣使來賀乾元節

本紀第十九興宗二

十一年春正月○庚戌遣南院宣徽使蕭特末翰林學士劉六符使宋取晉陽及瓦橋以南十縣地

宋元通鑑曰慶歷二年春三月契丹來求關南地時契丹主漸長國內無事戶口蕃息慨然有南侵意會元昊反欲乘釁取瓦橋關以南十縣地聚兵幽薊聲言南下

六月

宋元通鑑曰六月契丹兵壓境詔王德用判定州兼三路都部署德用時教士卒習戰契丹遣人來覘或請捕之德用曰吾軍整而使覘者得實以歸是屈人兵以不戰也明日大閱於郊下令具糗糧聽吾鼓視吾旗所向覘者歸告虜中謂漢兵將大至和議益決

八月

遼史攷異宋奉使諸臣年表曰八月兵部員外郎兼侍御史知雜事程戡西上閤門副使張得一賀國母生辰太常丞直集賢院張方平東頭供奉官閤門祇

候劉舜臣賀國主生辰兵部員外郎集賢校理判三  
司開拆司楊偉禮賓副使王仁旭賀國母正旦鹽鐵  
判官兵部員外郎方偕禮賓副使王易賀國主正旦  
九月壬寅遣北院樞密副使耶律仁先漢人行宮副部  
署劉六符使宋約和是時富弼爲上言大意謂遼與宋  
和坐獲歲幣則利在國家臣下無與與宋交兵則利在  
臣下害在國家上感其言和好始定

宋元通鑑曰富弼至契丹見契丹主曰兩朝人主父  
子繼好垂四十年一旦求割地何也契丹主曰南朝  
違約塞鴈門增塘水治城隍籍民兵將以何爲羣臣

請舉兵而南吾謂不若遣使求地求而不獲舉兵未  
晚弼曰北朝忘章聖皇帝大德乎澶淵之役苟從諸  
將言北兵無得脫者且北朝與中國通好則人主專  
其利而臣下無所獲若用兵則利歸臣下而人主任  
其禍故勸用兵者皆爲身謀爾契丹主曰何謂也弼  
曰晉高祖欺天叛君末帝昏亂土宇狹小上下離叛  
故契丹全師獨克然虜獲金幣充牣諸臣之家而壯  
士健馬物故太半今中國提封萬里精兵百萬法令  
修明上下一心北朝欲用兵能保其必勝乎就使其  
勝所亡士馬羣臣當之歟抑人主當之歟若通好不

絕歲幣盡歸人主羣臣何利焉契丹主大悟首肯者久之弼又曰塞鴈門者備元昊也塘水始於何承矩事在通好前城隍皆修舊民兵亦補闕非違約也契丹主曰微卿言吾不知其詳雖然吾祖宗故地當見還也弼曰晉以盧龍賂契丹周世宗復取關南地皆異代事若各求地豈北朝之利哉旣退劉六符曰吾主恥受金幣堅欲十縣何如弼曰本朝皇帝嘗言爲祖宗守國豈敢妄以土地與人北朝所欲不過租賦爾朕不忍多殺兩朝赤子故屈已增幣以代之若必欲得地是志在敗盟假此爲詞爾澶淵之盟天地鬼

神實臨之北朝首發兵端過不在我天地鬼神其可欺乎六符謂其介曰南朝皇帝存心如此大善當共奏使兩主意通明日契丹主召弼同獵引弼馬自近謂曰得地則歡好可久弼反覆陳其不可狀且言北朝旣以得地爲榮南朝必以失地爲辱兄弟之國豈可使一榮一辱哉

復古按富弼奉使與遼主問答語拾遺所載僅十之一今備錄於此

朱翌猗覺寮雜記曰富鄭公使遼爭獻納二字甚切後之議者以爲二字不必苦爭孔子適季孫季孫之

宰曰君使人假馬將與之乎孔子曰吾聞君取於臣  
謂之取與於臣謂之賜臣取於君謂之假與於君謂  
之獻季孫悟遂命其宰自今往君有取之一切不得  
復言假也鄭公力不肯言獻以此也夫然非博學通  
古今其可出疆○孔氏談苑曰姚跂回曰自來奉使  
北朝禮遇之厚無如王拱辰預釣魚放鵲之會皇帝  
親御琵琶以侑酒是時先父館伴相得甚歡拱辰謂  
先父曰南朝峭漢惟吾異日先父爲上道此語上曰  
拱辰答問似此語言極多其才器不在人下然識量  
不足難於遠到吾見奉使之人惟富弼不可量也因



問南朝人才有幾弼曰臣斗筭之器不足道本朝人才勝如臣者車載斗量安可數計察斯人大未可量  
○宋史曰慶歷二年冬十月丙辰知制誥梁適報使契丹

十二年○八月

遼史攷異宋奉使諸臣年表曰八月起居舍人知制誥孫抃洛苑副使馮行己賀國母生辰鹽鐵副使工部郎中張盥之西頭供奉官閣門祗候丁億賀國主生辰戶部員外郎兼侍御史知雜事魚周詢閣門通事舍人李惟賢賀國母正旦工部郎中李鉞東頭供

奉官閣門祇候趙牧賀國主正旦

溫之除轉運以右正言集賢校理余

靖爲國主

正旦使

十三年○夏四月

契丹國志曰夏四月朔日食 帝以弟鄭王宗元加

兵馬大元帥封晉國王樂郡王宗德進封幽王中山

王宗正進封魯王豫章王宗熙進封齊王節度使宗

哲進封長沙王

六月○駐蹕永安山以將伐夏遣延昌宮使耶律高家

奴告宋

東都事略曰契丹來告舉兵討元昊時冊命元昊爲

夏國主使將行而止之以俟契丹使富弼曰若契丹使未至而行則事自我出既至則恩歸契丹矣從之是歲契丹受禮雲中且發兵會元昊伐杲兒族於河東爲近仁宗問弼曰契丹得無與元昊襲我乎弼曰契丹自幽薊不復由河東入寇者以河北平易富饒而河東險瘠且虞我出鎮定擣燕薊之虛也今兵出無名契丹大國決不爲此就使妄動當出我不意不應先言受禮雲中也元昊本與契丹約相左右以困中國今契丹背約結好於我獨獲重幣元昊有怨言故契丹築威塞州以備之杲兒屢殺威塞人契丹疑

元昊使之故爲是役安能合而寇我哉或請調發爲  
備弼曰契丹雖不來猶欲以虛聲困我若調發正墮  
其計臣請任之契丹若入寇臣爲誤國仁宗乃止契  
丹卒不動

八月

遼史攷異宋奉使諸臣年表曰八月右王言祕閣校  
理孫甫如京使夏防賀國母生辰太常少卿直史館  
劉夔崇儀使楊宗讓賀國主生辰鹽鐵判官祠部員  
外郎祕閣校理張瓌內園副使焦從約賀國母正旦  
開封府推官監察御史劉湜東頭供奉官閣門祗候

李士勳賀國主正旦

九月○壬申會大軍於九十九泉以皇太弟重元北院樞密使韓國王蕭惠將先鋒兵西征

宋元通鑑曰冬十月契丹主宗眞親將騎兵十萬出金肅城遣弟重元將騎兵七千出南路樞密使蕭惠將騎兵六萬出北路三路濟河長驅入夏境四百里不見敵據德勝寺南壁以待惠與元昊戰於賀蘭山北敗之

冬十月○癸丑督數路兵掩襲殺數千人駙馬都尉蕭胡覩爲夏人所執

宋元通鑑曰元昊縱典急攻惠營敗之乘勝攻南壁契丹主大敗從數騎走得免元昊入樞密使蕭孝友砦執駙馬蕭胡覲以去

十四年

遼史攷異宋奉使諸臣年表曰八月右正言知制誥楊察東上閣門使新州刺史王克忠賀國母生辰戶部判官祠部郎中張堯佐西上閣門副使張希一賀國主生辰度支判官祠部員外郎集賢校理率昭邁供備庫副使閣門通事舍人李璋賀國母正旦

冬十月

宋史曰慶歷五年冬十月乙卯契丹遣使來獻九龍  
車及所獲夏國羊馬

十五年○八月

遼史攷異宋奉使諸臣年表曰八月刑部員外郎知  
制誥王琪六宅使嘉州刺史錢晦賀國母生辰右司  
諫知制誥錢明逸內園副使閣門通事舍人楊宗說  
賀國主生辰戶部判官侍御史王平左班殿直閣門  
祇候王道恭賀國母正旦金部郎中判三司句院許  
宗壽內殿承制夏元吉賀國主正旦○契丹國志曰  
東京畱守耶律忽北叛入高麗命將軍蕭迪誅之

本紀第二十興宗三

十六年

錢大昕潛研堂金石文跋尾曰右釋迦佛舍利塔記興中故城之址有浮圖三焉土人名其地曰三座塔其南塔之前嘗有掘上得地宮一崇八尺廣六尺五寸八面相等周遭嵌碑文其一片云維大契丹國興中府重熙十五年丙戌歲十一月丁丑朔十六日壬辰起手鑄次年四月乙巳朔八日壬子午時葬釋迦佛舍利記凡五十字字大徑二寸餘末載辦塔主僧則覺花島海雲寺業律沙門志全也塔徙於天慶二



年以釋慧材所撰記攷之塔蓋十三簷藏釋迦佛舍利一千三百餘顆定光佛舍利六百餘顆此惟云釋迦文不備也遼自太宗建國號大遼以後聖宗統和元年復國號曰大契丹道宗咸雍二年復稱大遼遼史俱沒而不書國號之更易事莫大於是尚不盡書其餘之闕漏可勝言哉讀此碑益慨然於文獻之無徵也○遼史攷異宋奉使諸臣年表曰八月刑部員外郎知諫院吳鼎臣內殿承制閣門祇候夏佺賀國母生辰太常博士集賢校理同修起居注判度支句院韓綜供備庫副使柳涉賀國主生辰戶部判官刑

部郎中崔嶧內殿崇班閣門祇候侍其演賀國母正旦鹽鐵判官司勳員外郎劉立之內殿崇班李中佑賀國主正旦

十七年○八月

遼史攷異宋奉使諸臣年表曰八月祠部員外郎集賢校理同修起居注胡宿如京使兼閣門通事舍人李珣賀國母生辰度支判官太常博士集賢校理何中立內殿承制閣門祇候鄭餘懿賀國主生辰工部郎中判度支句院李仲偃左侍禁閣門祇候孫世京賀國母正旦司勳郎中判理欠憑由司李永德左侍

禁閣門祇候康遵度賀國主正旦

十八年○八月

遼史攷異宋奉使諸臣年表曰八月右正言知制誥  
李絢供備副使曹偕賀國母生辰度支副使戶部員  
外郎梅摯內殿承制閣門祇候李永寶賀國主生辰  
禮部員外郎兼侍御史知雜事何郯內殿崇班閣門  
祇候柴貽範賀國母正旦著作佐郎直集賢院同修  
起居注呂溱閣門通事舍人侯宗亮賀國主正旦

十九年○八月

遼史攷異宋奉使諸臣年表曰八月工部郎中天章

遼史拾遺補

卷二

十一  
拆紹堂抄刊

閣待制李東之西京左藏庫使李綬賀國母生辰戶部員外郎兼御史知雜事李兌供備庫副使李賡賀國主生辰鹽鐵判官司封員外郎崇文院檢討孫瑜閣門通事舍人王道恭賀國母正旦司勳員外郎判三司開拆司寇平內殿崇班閣門祇候鄭餘慶賀國主正旦

二十年

遼史攷異宋奉使諸臣年表曰八月翰林學士刑部郎中知制誥兼侍講史館修撰曾公亮西京左藏庫使郭廷珍賀國母生辰工部郎中知制誥史館修撰

兼侍講王洙閣門通事舍人李惟賢賀國主生辰戶部判官屯田郎中燕度內殿崇班閣門祇候張克己賀國母正旦太常博士直集賢院同修起居注王珪東頭供奉官閣門祇候曹偁賀國主正旦

二十一年○夏四月

周輝清波別志曰韓公綜爲館伴契丹使北人欲爲書稱北朝而去契丹號韓謂曰自古未有建國而無號其議遂塞

八月

遼史攷異宋奉使諸臣年表曰八月戶部副使兵部

郎中傅永文思副使潘承嗣賀國母生辰禮部員外郎兼侍御史知雜事張擇行西染院副使兼閤門通事舍人夏俛賀國主生辰權鹽鐵判官都官員外郎蔣賁內殿承制閤門祇候李中謹賀國母正旦太常博士直集賢院同修起居注判鹽鐵句院韓絳東頭供奉官閤門祇候王易賀國主正旦

冬十月

契丹國志曰冬十月朔日食

二十二年

遼史攷異宋奉使諸臣年表曰八月度支副使工部

郎中周沆左藏庫副使錢昫賀國母生辰起居舍人  
知諫院韓贄供備庫副使彭再昇賀國主生辰戶部  
判官刑部員外郎張去惑內殿崇班夏僖賀國母正  
旦右正言直集賢院賈黯左侍禁閤門祇候王咸宣  
賀國主正旦○祝穆方輿勝覽曰昌元縣南二十里  
老鴉山有李戡李殲兄弟善碁會虜索碁戰於國朝  
詔求天下善弈者蜀帥以戡應詔虜望風知畏不敢  
措手

復吉案此係宋仁宗皇祐間事故錄於此

二十三年

遼史攷異宋奉使諸臣年表曰八月起居舍人直集  
賢院同修起居注吳奎禮賓副使郭遼賀國母生辰  
鹽鐵判官主客郎中宋選供備庫副使王士全賀國  
主生辰開封府判官殿中侍御史俞希孟閣門通事  
舍人夏伸賀國母正旦司封員外郎直龍圖閣兼天  
章閣侍講盧士宗西頭供奉官閣門祇候李惟賓賀  
國主正旦

二十四年○八月○己丑帝崩於行宮年四十

契丹國志曰興宗時南北無事歲受南宋餽遺百四  
五十年內府之儲珍異固山積也○孫升孫公談圃



曰趙志忠自契丹歸朝官至正郎嘗求差遣不報在都堂厲聲曰天下只有閻羅大王至公若教不公似志忠底已死二三十个志忠歸中國時上書及得契丹文字甚多蓋志忠嘗爲契丹史官也○郡齋讀書後志曰虜廷雜記十卷契丹降人趙志忠撰記虜廷雜事始於阿保謹迄於耶律宗真李清臣云志忠仕虜爲中書舍人得罪宗真來歸上此書及契丹地圖言虜中事甚詳○陳振孫直齋書錄解題曰陰山雜錄十六卷不著名氏莆田鄭氏書目云趙志忠撰歐公歸田錄云志忠本華人自幼陷虜爲人明敏在虜

中舉進士至顯官歸國能述虜中君臣世次山川風物甚詳今觀此書可槩見矣

復吉案趙志忠歸宋不知興宗何年姑附於此

本紀第二十一道宗一

改元清寧○十二月○丙申宋遣歐陽修等來賀卽位  
遼史攷異宋奉使諸臣年表曰八月遼興宗殂遣翰林學士吏部郎中知制誥史館修撰歐陽修四方館使果州團練使向傳範爲賀登位使龍圖閣直學士兵部郎中呂公弼西上閤門使英州刺史郭諮爲祭奠使鹽鐵副使工部郎中李參內苑使兼閤門通事

舍人夏佺爲弔慰使右正言知制誥劉敞文思副使  
竇舜卿賀國母生辰戶部副使工部郎中張揆西染  
院副使閤門通事舍人王道恭賀國主生辰起居舍  
人直祕閣知諫院范鎮內殿承制閤門祇候王光祖  
賀國母正旦權度支判官刑部員外郎李復圭染院  
副使兼閤門通事舍人柴貽範賀國主正旦

二年○八月

遼史攷異宋奉使諸臣年表曰八月刑部員外郎知  
制誥石揚休文思使康州刺史沈惟恭賀國母生辰  
刑部員外郎直史館同修起居注唐詢東頭供奉官

閣門祇候王鐔賀國主生辰祠部員外郎判度支句  
院集賢校理刁約供備副使劉孝孫賀國母正旦右  
司諫馬遵內殿崇班閣門祇候陳永圖賀國主正旦  
三年○八月

遼史攷異宋奉使諸臣年表曰八月鹽鐵副使刑部  
員外郎郭申錫西京左藏庫副使王世延賀國母生  
辰右司諫呂景初西京左藏庫副使張利一賀國主  
生辰度支判官祠部郎中直祕閣王疇西染院使李  
璘賀國母正旦殿中侍御史吳中復東頭供奉官閣  
門祇候宋孟孫賀國主正旦

四年春正月○癸酉宋遣使奉宋主繪像來

東都事略曰契丹主見御容驚肅再拜退而謂左右  
曰我若生在中國不過與之執鞭持蓋爲一都虞候  
耳○契丹國志曰帝以御容於慶州崇奉每夕宮人  
理衣衾朔日月半上食食氣盡登臺而燎之曰燒飯  
惟祀天與祖宗則然○龔鼎臣東原錄曰張昇果卿  
嘉祐二年夏回虜聘求聖上儀容事昇見戎主言前  
來皇帝曾將過御容在南朝蓋以代相見耳今已稱  
姪須我主復圖儀容去則南朝必送聖範來蓋前來  
是弟兄卽弟先送今是伯姪姪宜先來卽伯後答如

此先後順也迄從其議

五月

宋史曰嘉祐三年五月甲午契丹遣使致其祖母遺  
畱物○遼史攷異宋奉使諸臣年表曰八月權鹽鐵  
副使工部郎中王鼎閣門通事舍人王咸有賀國母  
生辰開封府判官度支郎中李及之內殿崇班閣門  
祇候王希甫賀國主生辰度支判官刑部郎中朱壽  
隆禮賓使王知和賀國母正旦太常博士直集賢院  
判戶部句院祖無擇內殿承制閣門祇候王懷玉賀  
國主正旦

五年

遼史攷異宋奉使諸臣年表曰八月戶部員外郎天章閣待制唐介六宅使梅州刺史桑宗望賀國母生辰侍御史丁詡左藏庫副使劉建勳賀國主生辰開封府判官工部郎中張中庸左藏庫副使馮文顯賀國母正旦太常博士集賢校理判理欠憑由司沈邁供備副使高繼芳賀國主正旦

六年

遼史攷異宋奉使諸臣年表曰八月刑部郎中天章閣待制兼侍讀錢象先西染院副使閣門通事舍人

夏偉賀國母生辰侍御史陳經東頭供奉官閣門祇  
候郭靄賀國主生辰鹽鐵判官刑部郎中閤詢西京  
左藏庫副使劉禧賀國母正旦戶部判官兵部郎中  
祕閣校理王繹西頭供奉官閣門祇候趙元中賀國  
主正旦

七年

遼史攷異宋奉使諸臣年表曰閏八月戶部郎中知  
制誥張瓌如京使朱克明賀國母生辰度支判官刑  
部員外郎集賢校理宋敏求西染院副使閤門通事  
舍人張山甫賀國主生辰司封郎中楊佐供備庫副



使李宗賀國母正旦鹽鐵判官度支員外郎集賢校理王益柔內殿崇班閤門祇候王淵賀國主正旦○直齋書錄解題曰燕北雜錄五卷西征塞地圖附思卿武珪記嘉祐六年宮苑使知雄州趙案此處原本闕一字進於朝珪自契丹逃歸事見國史傳

本紀第二十二道宗二

九年○三月辛未宋主禎殂以姪曙爲子嗣位

宋史曰嘉祐八年仁宗崩夏四月癸酉遣王道恭告哀於契丹乙亥遣韓贄等告卽位於契丹六月辛卯契丹遣蕭福延等來祭弔○契丹國志曰宋

仁宗崩契丹遣使祭大行於皇儀殿遂見宋嗣帝英宗於東廂嗣帝痛哭久之

秋七月○己未族逆黨家

契丹國志曰宗元作亂其先遣來南宋使者數人皆宗元之黨也過白溝悉以檻車載至誅之獨蕭福延以兄福美有功獲免

十一月

宋史曰十一月辛亥契丹遣蕭素等來賀卽位

十年○十二月

宋史曰治平元年八月乙卯遣兵部員外郎呂誨等

四人充賀契丹太后生辰正旦使刑部郎中章岷等  
四人充賀契丹主生辰正旦使 十二月丙辰契丹  
遣耶律烈等來賀壽聖節蕭禧等來賀明年正旦  
咸雍元年○八月

宋史曰治平二年六月甲寅詔遣官與契丹定疆界  
八月壬子以工部郎中蔡抗等充賀契丹生辰使  
侍御史趙鼎等充賀契丹正旦使

二年春正月○冬十二月

宋史曰治平三年春正月丙辰朔契丹遣使耶律仲  
達等來賀正旦戊午契丹遣使蕭惟輔等來賀壽聖

節 八月庚午遣傅卞等賀遼主生辰張師顏等賀  
正旦 十二月癸卯遼遣蕭靖等來賀正旦壽聖節  
三年○六月○九月○十二月

宋史曰治平四年六月己酉遼遣蕭餘慶等來弔祭  
九月辛卯遣孫思恭等報謝於遼且賀生辰正旦  
甲午遼遣耶律好謀等來賀卽位 十二月己巳遼  
遣蕭傑等來賀正旦○遼史攷異宋奉使諸臣年表  
曰按宋史蘇案傳使契丹還道聞英宗晏駕契丹置  
宴仍用樂撤之楊佐傳英宗升遐奉遺畱物再往使  
卒於道此二人亦治平四年事也

四年○十二月

宋史曰熙寧元年八月丁卯遣張宗益等賀遼主生辰正旦○十二月甲子遼遣耶律公質等來賀正旦○周輝清波雜志曰呂正獻公以翰林學士館伴北使使頗桀黠語屢及朝廷政事公摘契丹隱密詢之曰北朝嘗試進士出聖心獨悟賦賦無出處何也使  
人愕然語塞

復吉案此不知何年事因呂公著爲翰林學士在  
神宗初年故補錄於此

五年○九月○十二月

宋史曰熙寧二年四月壬寅遼遣耶律昌來賀同天節○九月丁丑遣孫固等賀遼主生辰正旦○十二月戊子遼遣蕭惟禧等來賀正旦

六年○夏四月○八月○十二月

宋史曰熙寧三年夏四月丙寅遼遣耶律寬來賀同天節○八月戊寅遣張景憲等賀遼主生辰正旦○十二月壬午遼遣蕭遵道等來賀正旦

七年○夏四月○八月○十二月

宋史曰熙寧四年夏四月辛酉遼遣蕭廣等來賀同天節○八月癸酉遣楚建中等賀遼主生辰正旦○

十二月丙子遼遣耶律紀等來賀正旦

本紀第二十三道宗三

八年○夏四月○八月○十二月

宋史曰熙寧五年夏四月乙卯遼遣耶律適等來賀  
同天節○八月癸巳遣崔台符等賀遼主生辰正旦  
○十二月己亥遼遣蕭瑜等來賀正旦

九年○夏四月○八月○十二月

宋史曰熙寧六年夏四月丁丑遼遣耶律寧等來賀  
同天節○八月壬申朔遣賈昌衡等賀遼主生辰正  
旦○十二月丙申遼遣耶律洞等來賀正旦

十年○夏四月○十二月

宋史曰熙寧七年夏四月癸酉遼遣耶律永寧等來賀同天節○八月丁丑遣張芻等賀遼主生辰正旦○十二月己丑遼遣耶律寧等來賀正旦

太康元年○夏四月○八月○十二月

宋史曰熙寧八年夏四月丁卯遼遣耶律景熙等來賀同天節○八月丙申遣謝景溫等賀遼主生辰正旦○十二月癸丑遼遣耶律世通等來賀正旦

二年○八月○九月○十二月

宋史曰熙寧九年夏四月辛卯遼遣耶律庶幾等來



賀同天節 丙午遣王苑臣等弔慰於遼 八月己

丑遣程師孟等賀遼主生辰正旦 九月己卯遼遣

使回謝 十二月丁未遼遣耶律運等來賀正旦

三年○夏四月

宋史曰熙寧十年夏四月乙酉遼遣蕭儀等來賀同

天節

八月

厲鶚宋詩紀事曰蘇頌使北時贈同事閣使復吉案

姚麟爲西詩云山路盡陂陀行人涉險多風頭沙磧

暗日上雪霜和草淺鷹飛地冰流馬飲河平生畫圖

見不料此經過

十二月

宋史曰十二月辛丑遼遣耶律孝淳等來賀正旦

四年○夏四月○八月○十二月

宋史曰元豐元年夏四月己酉遼遣耶律永寧等來

賀同天節 八月甲寅遣黃履等賀遼主生辰正旦

十二月丙寅遼遣耶律隆等來賀正旦

本紀第二十四道宗四

五年○夏四月○八月○十二月

宋史曰元豐二年夏四月甲辰遼遣蕭晟等來賀同

天節 八月壬寅遣李清臣等賀遼主生辰正旦  
十二月庚申遼遣蕭寧等來賀正旦

六年○夏四月○十二月

宋史曰元豐三年夏四月己亥遼遣耶律永芳等來  
賀同天節 八月癸丑遣王存等賀遼主生辰正旦  
十二月甲辰遼遣蕭偉等來賀正旦

七年○十二月

宋史曰元豐四年夏四月癸亥遼遣耶律祐等來賀  
同天節 十二月戊寅遼遣蕭福全等來賀正旦  
八年○夏四月

宋史曰元豐五年夏四月丁巳遼遣耶律永端等來賀同天節○龐元英文昌雜錄曰余奉使至雄州五月二十一日次白溝驛是日晚雨雹其大如拳屋瓦多碎彼人曰歲常如此尤有甚於此者目所未覩也○宋史曰八月辛未遣韓忠彥等賀遼主生辰正旦○張溟雲谷雜記曰韓魏公之子忠彥聘遼國主知其爲公子問嘗使南朝者形貌肖韓相公否皆曰然遂圖忠彥之像

十二月

宋史曰十二月壬申遼遣耶律儀等來賀正旦

九年○夏四月○八月

宋史曰元豐六年夏四月辛亥遼遣蕭固等來賀同  
天節○八月乙酉遣蔡京等賀遼主生辰正旦○邵  
經邦宏簡錄曰蔡卞使遼遼人聞其名卞適有寒疾  
命載以白駝車車爲契丹主所乘乃異禮也

十年○夏四月○冬十二月

宋史曰元豐七年夏四月乙亥遼遣蕭浹等來賀同  
天節 八月辛巳遣陳睦等賀遼主生辰正旦○十  
二月辛卯遼遣耶律襄等來賀正旦

大安元年○八月

遼史攷異宋奉使諸臣年表曰八月刑部侍郎楊汲  
皇城使高州刺史王澤朝請大夫戶部郎中韓宗道  
崇儀使嘉州刺史帶御器械劉承緒賀國主生辰光  
祿呂嘉問左藏庫使劉永淵朝請郎衛尉少卿陳侗  
西京左藏庫使高遵治賀正旦

十二月

宋史曰元豐八年十二月乙酉遼遣蕭睦等來賀正  
旦

二年○八月

遼史攷異宋奉使諸臣年表曰八月給事中胡宗愈

客省副使李琮中書舍人蘇軾西京左藏庫副使兼  
閣門通事舍人高士敦賀國主生辰朝奉郎直龍圖  
閣太僕少卿高遵惠左藏庫使李嗣徽朝散大夫司  
勳郎中晁端彥供備庫使楊安立賀正旦軾辭不行  
本紀第二十五道宗五

三年

遼史攷異宋奉使諸臣年表曰八月戶部侍郎張頡  
皇城使楊永節中書舍人曾肇皇城使向綽賀國主  
生辰太僕少卿王欽臣西作坊使劉用賓工部郎中  
盛陶西頭供奉官閣門祗候趙希魯賀正旦

四年○八月

遼史攷異宋奉使諸臣年表曰八月龍圖閣直學士  
工部侍郎蔡延慶皇城使海州防禦使劉永壽給事  
中顧臨文思副使段綽賀國主生辰司農少卿向宗  
旦西京左藏庫使高遵禮戶部郎中王同老內殿崇  
班閣門祇候賈祐賀正旦

五年

遼史攷異宋奉使諸臣年表曰八月刑部侍郎趙君  
錫閣門通事舍人高遵固翰林學士蘇轍閣門通事  
舍人朱伯材賀國主生辰少府監韓正彥閣門祇候



賈裕太府少卿陳紘閣門祇候曹喚賀正旦

六年

遼史攷異宋奉使諸臣年表曰八月中書舍人鄭雍  
引進副使王舜封太僕卿林旦莊宅使張佑賀國主  
生辰吏部郎中蘇注西頭供奉官閣門祇候陸孝立  
戶部郎中劉昱西京左藏庫副使畢可濟賀正旦

七年○八月

遼史攷異宋奉使諸臣年表曰八月刑部侍郎彭汝  
礪西上閣門副使宋球鴻臚卿高遵惠左藏庫使曹  
諮賀國主生辰吏部郎中趙偁西京左藏庫使王鑒

司農少卿程博文左藏庫副使康曷賀正旦

八年

清波別志曰元祐七年樞密院言遼使耶律迪病且  
殆自通好後未有故事今用章頻王咸宜奉使卒於  
契丹北人津送體例比類預立畫一送館伴所密掌  
之如迪死卽施行迪竟死於滑州賻贈外加賜黃金  
百兩就差知通利軍守臣假中大夫充監護使遣內  
侍馳驛治喪事初太常寺言典故無例輟朝詔用節  
度使喪格輟一日爾後雖有增損大抵不踰此制○  
遼史攷異宋奉使諸臣年表曰八月權刑部侍郎王

覲皇城使忠州刺史張藻刑部侍郎豐稷六宅使郝  
惟幾賀國主生辰太常少卿宇文昌齡供備庫使曹  
讀殿中侍御史吳立禮內殿承制閣門祇候向緯賀  
正旦

九年

遼史攷異宋奉使諸臣年表曰按呂陶傳以中書舍  
人奉使契丹在哲宗親政之前當是此年事又蘇東  
坡有送王敏仲北使詩施元之注敏仲名古以太常  
少卿奉使契丹亦當在此年

本紀第二十六道宗六

壽隆元年

遼史攷異曰按洪遵泉志載壽昌元寶錢引李季興  
東北諸蕃樞要云契丹主天祐年號壽昌又引北遼  
通書曰天祚卽位壽昌七年改元乾統予家藏易州  
興國寺碑安德州靈巖寺碑興中府玉石觀音像唱  
和詩碑皆壽昌中刻東都事略文獻通考皆宋人書  
也亦稱壽昌無有云壽隆者可證壽隆乃壽昌之譌  
也遼人謹於避諱如光祿改爲崇祿避太宗諱也女  
眞改爲女直避興宗諱也天祚名延禧故追改重熙  
年號爲重和於嫌名猶必回避如此道宗乃聖宗之

孫而以壽隆紀年此理所必無者

二年○二月

宋元通鑑曰紹聖三年二月生女真節度使頗刺淑死弟盈哥嗣以兄劾者子撒改爲國相時紇石烈部阿疎有異志盈哥召之阿疎與部人毛睹祿阻兵爲難盈哥自往伐之至阿疎城阿疎聞之往訴於遼遼遣使止盈哥勿攻盈哥畱劾者守阿疎城而還

三年○八月

遼史攷異宋奉使諸臣年表曰八月禮部侍郎范鏗左藏庫使兼閤門通事舍人向緯賀遼生辰太常少

卿林邵供備庫使兼閤門通事舍人張宗尚賀遼正旦案中書舍人朱服右司員外郎時彥奉使本傳不載其年當在紹聖中也毗陵志余中於紹聖中使遼不知何年又長編載元符二年蹇序辰奏取勘客省帳茶酒有王曉例是曉亦從前奉使者也

四年

遼史攷異宋奉使諸臣年表曰八月朝請郎權禮部尚書蹇序辰皇城使泰州團練使李嗣徽賀遼生辰朝散郎度支郎中王詔西京左藏庫副使曹矜賀遼

正旦

五年

潛研堂金石文跋尾曰右玉石觀音像詩碑首唱者  
崇祿大夫檢校太師行鴻臚卿英辨大師賜紫沙門  
智化和之者兵部尚書兼門下侍郎平章事鄭若愚  
左僕射兼中書侍郎平章事韓資讓兵部尚書興中  
尹趙庭睦諸行宮都部署尚書左僕射梁援特進禮  
部尚書參知政事趙長敬觀書殿學士翰林學士行  
尚書禮部侍郎知制誥馬元俊中大夫昭文館直學  
士知御史中丞開國侯劉瓌度支使金紫崇祿大夫  
行尚書禮部郎史仲愛乾文閣待制史館修撰曲正

夫朝請大夫守祕書監開國伯賜紫金魚袋王執中  
南面統行宮都部署□□□尚書吏部員外郎于復  
先前樞密院吏房承旨行殿中少監王仲華朝議大  
夫知制誥開國子孟初朝散大夫司農少卿知大定  
少尹賜紫金魚袋張識司農少卿知度支副使楊滌  
瑕守殿中少監知析津縣事李師範□□□□行  
御史中丞賜紫金魚袋李□□提點弘法守將作監  
張□□內藏副都監朝散大夫尚書虞部郎中借紫  
寇□□殿中丞直史館張壻左承制閣門祗候韓汝  
礪崇祿大夫檢校司徒辨慧詮正大師賜紫沙門善



口凡二十二人書石并篆額者門人講華嚴經苾芻  
性煦也立碑年月則壽昌五年九月也遼史韓延徽  
傳資讓壽隆初拜中書侍郎平章事道宗紀壽隆三  
年四月南府宰相趙延睦出知興中府事九月以梁  
援爲漢人行宮都部署碑載三人結銜皆與史合碑  
有平章事鄭若愚參知政事趙長敬而遼史無之惟  
本紀壽隆元年見參知政事趙孝嚴六年見宰相鄭  
顥官同姓同而名則互異不可解也

冬十月○丁卯宋遣郭知章曹平來聘

契丹國志曰春三月宋詔郭知章報聘初蕭德崇堅

乞於國書內增休退兵馬還復土疆等語往復議論  
宋帝不從德崇畱京師凡三十七日乃歸

六年○八月

宋史曰元符三年八月丙午遣董敦逸賀遼主生辰  
呂仲甫賀正旦

十二月

宋元通鑑曰元符三年十二月女真攻阿疎城取之  
○宋史曰十二月戊午遼人來賀正旦

七年春正月○甲戌上崩於行宮○遣詔燕國王延禧  
嗣位

契丹國志曰遼帝大漸戒孫延禧曰南朝通好歲久  
汝性剛切勿生事又戒大臣曰嗣君若妄動卿等當  
力諫之帝聰達明睿端嚴若神觀書通其大略神  
領心解嘗有人講論語至北辰居其所而衆星共之  
帝曰吾聞北極之下爲中國此豈其地耶○潘永因  
宋稗類鈔曰章惇之貶遼主方食聞之放箸而起稱  
善者再謂南朝錯用此人又問何爲只若是行遣及  
聞溫公之相救其邊吏曰中國相司馬矣慎無生事  
開邊釁○澠水燕談曰韓魏公元勳舊德夷夏具瞻  
熙寧畱守北都遼使每過境必先戒其下曰韓丞

相在此無得過有呼索遼使與京尹書故事紙尾止  
押字是時悉書名其爲遼人尊畏如此○孫宗鑑東  
皐雜錄曰李章奉使北庭遼館伴發一語云東坡作  
文多用佛書中語李答云曾記赤壁詞曰檣櫓灰飛  
煙滅所謂灰飛煙滅四字乃圓覺經語云火出木燼  
灰飛煙滅北使默無語

復吉案此數事不知係何年姑附於此